

四庫全書

經部

欽定四庫全書

經部
樂律全書卷九

詳校官內閣學士管理樂部館纂

侍讀臣孫球覆勘

總校官降調編修臣倉聖脉

校對官中書臣陸湘

騰錄監生臣朱上林

繪圖監生臣徐溥

欽定四庫全書

樂律全書卷九

明 朱載堉 撰

律呂精義內篇


樂器圖樣第十之下

絲音之屬總序


臣謹按禮記曰大琴大瑟中琴小瑟四代之樂器也
則琴瑟之有大小可知矣故爾雅曰大瑟謂之灑大

琴謂之離郭璞謂皆二十七弦非也至宋陳暘遂謂
大琴二十弦中琴十弦大瑟五十弦小瑟五弦其謬
益甚殊不知琴瑟度數雖有大小而其弦數則無增
減是故大琴小琴皆止七弦大瑟小瑟皆止二十五
弦特律尺長短不同耳琴瑟大者以黃鍾正律之管
為尺中者以太簇正律之管為尺小者以姑洗正律
之管為尺是謂律度之尺周禮所謂以十二律為之
數度是也


七弦琴小樣



大




中



小

琴瑟各分三等
皆以桐木為之
髹以黑漆琴身
通長五尺五寸
首廣九寸尾廣
六寸肩廣一尺
齧岳中間五尺
樣制與常琴同


樣小瑟弦五十二



大



中



小

瑟身通長九尺
首長九寸廣二
尺尾長一尺八
寸廣一尺六寸
兩岳中間六尺
三寸尾下兩旁
垂雲各六樣制
大率與今箏同

琴箴瑟銘 共二首

揆神農之初制尚火德之數七效法四時五行則象三才萬物斲以嶧陽之桐髹以楚宮之漆軫以崑山之玉徽以麗水之金誠六樂之所重允百世之所欽雖然是皆末節非君子所謂琴君子於琴宜審其音或古或今孰雅孰淫謂調有古今曲有雅淫也大抵七音為均具乎二變則古五音為均駢乎二少則今粉偉而麗和平而中諧於操縵則雅幽沉而細趨數而濫流於操弄則

淫故曰琴之為言禁也禁其邪音也君子御之以儀節也非以惱心也是故弦絙而貴清聲宏而尚宮繁而有節和而不同詠清廟之七始歌鹿鳴之三終協文王於笙磬比關雎於鐘鼓聲凡八十有四曲凡三百有五崇先王之德音黜流俗之偽譜非歌不弦非弦不歌頌聲滿天地其樂更如何

凡二百六十字刻於琴腹之下

庖犧氏之創物兮始弦桐以為瑟象離三之虛中兮戴九梁而洞越弦大衍之五十兮不勝悲而半折浩朱襄

之飄風兮肇五弦於士達瞽三之為十有五兮重華作
而增八灑有番弦兮或二十而贏七必五五而迺定兮
與天數以為一紛弦樂之殊名兮皆放此而後出夫是
以稱樂器之宏兮莫敢擬大而度長歷炎黃而陶唐兮
為咸池之大章韶以詠而永言兮聲依永乎賡歌之明
良及周為雲和兮友之以龍門空桑想夫制作之妙伶
倫吹竽后夔拊手晏龍度左公輸斷右其長為黃鍾者
九兮倍其九以為首也其商為頌瑟兮其宮以為雅奏

也夫惟瑟聲者歌聲之所主弦二十有五兮旋宮具也
七弦相為律兮番弦五也鳳和鳴兮其句也鴈行飛兮
其柱也歌必取瑟兮既歌而語也徒歌曰謠兮徒鼓瑟
曰步也恒為堂上之樂兮瓠竹在下也名其為登歌之
器兮無故不去也瑟教廢則歌詩者莫之為譜也是以
聖門亟稱於瑟自琴以降豈無他弦而有所不必言焉
胡不觀於魯論乎孺悲之所聞點爾之侍坐由也之在
門弦歌之聲託瑟以傳又不觀於國風之唐秦乎唐有

山樞秦有車鄰皆專言乎鼓瑟不見刪於聖人胡不觀
文王之廟祀乎一唱三嘆應弦如見歌呼於穆遺聲盈
耳升歌示德舍瑟曷以又不觀於周公之禮經乎飲射
賓燕禮盛樂備登歌在堂間歌在陞或以瑟二或以瑟
四堂上侑歌惟瑟而已若迺騶虞狸首間若疊奏鄉樂
惟意二南先後燕有房中之弦樂學有宵雅之肄教皆
主於瑟而他弦莫侑此古人之所甚重今人之所駭笑
者也自韓非之妄論齊人之見擯秦蒙將軍剖之而為

箏易京君明變之而為準新聲代作古意浸泯若迺絲
聲之器遽數之莫能既侯氏之坎坎師延之靡靡嵇阮
寄嘯之具秦漢鼗鼓之戲於是六合百衲絲桐亦改其
制太乙天寶弦柱各出其新意吳蜀楚之聲不同平清
瑟之調滋異厥有鷗弦金縷左振右擊檀槽銀裝孤柱
四隅立搗卧摘竹軋木搯白虎之爪黃金之撥能使師
曠瞞瓠巴拙但見吃飽蘇葩俳優裸裎以助其喧噓都
曇臘答急笛悲篴以奮其啁哳觀其指法則秦箏多撮

琵琶多撈空侯多擘柳琴多擊竊比於琴家之孫吟按
抑孰若一弦一柱取聲於自然而不假弄手以為力也
弦樂莫先於瑟他弦行世而瑟不行焉是棄其祖而為
支裔之從摧其根而葆由枿之萌也若迺道調僊呂託
異人之夢授而律呂每混於俗稱怨湘哭顏疑胡琴之
避徵而曲調例闕其徵聲又孰若一均七律諸調皆在
焉而隔八之弦自相生也然而箏笛之耳未能聽古淡
者見操瑟而已嫉章句之儒僅知守詁訓者聞歌詩而

自失惟夫陸沈野逸舒湮宣鬱宛其俟命且以永日人
莫我好而吾瑟之僻於是采孤桐兮南山之陽致文梓
兮北山之北本以黃鍾度以周尺遂練朱而繩絲雖繪
錦而貴質小弦之縷七十餘二大弦之絲八十有一初
促柱以高張乍試手而拂歷始肄蒿苹之食載歌寤寐
之服但聞誦詩之聲莫知弦指之力逮手熟而習貫益
心悅而忘倦為之歌伐檀若有斷輪乎河岸為之鼓考
槃若有叩槃乎山澗方且陳懿戒以自警聽衡門而無

問賦白駒之逍遙諷淇澳之瑟僖和鐸鳴兮中清寄散
聲於咏嘆共赤松而調均異湘靈之悲怨儻流魚之能
聽付狸鼠於不見誦閒情以自欣虞僕人之見訕遂迺
避俗塵而韜錦且弛弦以回鴈善吾瑟而不鼓思悠悠
兮待旦亂曰皇羲肇瑟韶以詠兮姬孔歌詩瑟之盛兮
瑟遠詩存歌不傳兮孰能誦詩惟朱弦兮勿求諧世我
思古今解弦弭柱美昭文不鼓兮

一千一百八十九
字刻於瑟腹之下

論諸家瑟制之陋

曲禮曰士無故不徹琴瑟子游曰小人學道則易使小人指庶民也然則瑟乃士庶通用俗以為僭誤矣好古之士誠欲造瑟當於太常寺雅樂器中求其樣製如不可得只照箏樣最妙蓋瑟與箏大小雖異而樣製相同也長短高低比箏加半倍可也首尾廣狹比箏加一倍可也上弦設柱亦與箏同但音調不同耳或問瑟長八尺一寸其周尺歟抑近代之尺歟曰譬如琴長短不一皆可彈也瑟

長短由人耳巧匠見箏之形必能造瑟其圖見上文者足為證他書所載不足徵也若宋史樂志及文獻通考陳氏禮書樂書李氏律呂元聲古樂筌蹄韓氏志樂劉氏元義黃氏管見之類臆說杜撰樣製皆陋不足為法式也

論瑟不宜用黃弦

世儒以瑟為二十五弦者衆矣然未必合於先王之制蓋由夫具二均之說不明耳古之所謂中清

二均者是也今之所謂中清二均則非也噫此理
深奧苟非知音者不能喻之也喻之而不解故也
古所謂二均者具丈夫童子之二調而分男女老
少之聲今所謂二均者乃以黃弦界於朱弦之中
分內外各十二弦以應十二律而黃弦為君不彈
古無是說也樂記曰宮為君蓋樂以宮為主亦猶
人道以君為尊而宮音豈可以不彈不彈則無君
君斯亢而有悔矣夫弦樂以聲為本猶君以政令

宣示天下也今乃陽以黃色別之以示其尊而陰
欲置之無用之地使其無聲以喪其本豈可哉既
有黃鍾之宮而又添設黃色之弦命曰君弦於義
安取原其為說之由蓋以二十五弦其數奇若除
中弦則內外各十二以配律呂之數此不知音者
穿鑿之說耳今人信之不疑豈不謬哉鼓瑟之工
古用瞽矇為之彼既無目安識黃弦耶以此證之
則其穿鑿益可見矣其說不知起於何時樂記曰

清廟之瑟朱弦而疏越初未嘗有黃弦居中之說而莊子曰鼓之二十五弦皆動文子亦曰二十五弦各以其聲應二子皆周人也其言最古必有所本果如中弦不彈則不可謂之二十五弦皆動也淮南子曰今夫調弦者鼓之而二十五弦皆應是漢人未嘗有中弦不彈之說也杜氏通典曰頌瑟二十五弦盡用之是唐人亦未有中弦不彈之說也文獻通考曰宋朝太常瑟用二十五弦具二均

之聲以清中相應雙彈之第一弦黃鍾中聲第十
三弦黃鍾清應其按習也令左右手互應而所謂
第十三弦者即中弦耳蓋亦未嘗不彈也元史樂
志登歌樂器瑟用朱絲為弦凡二十有五各設柱
亦不言黃者居中央上自周漢下至宋元考諸載
籍皆未有是說不知從何而得之夫黃弦於瑟最
為害理而太常習久莫覺其非雖禮樂大事非敢
出位妄言然既知其誤亦不敢不言也此古所謂

芻蕘狂夫之末議固君子之所采而不以人廢也
聊著於此以俟後世知音之士或有所折衷耳

論瑟不宜用朱弦

古稱清廟之瑟朱弦所謂朱弦者特用於清廟云
耳清廟者文王之廟也樂用朱弦舞用朱干此天
子禮樂非諸侯而下所敢僭也人皆知僭用朱干
為非禮殊不知僭用朱弦亦非禮此禮不講近乎
僭矣朱弦尚近乎僭黃弦豈可僭乎料想孔門學

瑟亦未必用朱弦今之士庶學瑟只用冰弦可也
不獨士庶雖卿大夫鄉飲鄉射亦不可僭然鋪中
所賣者多是朱弦雜以黃弦切忌不宜用之無已
多買箏弦擇其粗大者兩條續一條用之可也

論瑟面不宜繪飾

按元史樂志瑟面施采色兩端繪錦此係近代俗
制非古制也古稱錦瑟不過用錦一幅置於瑟尾
以襯弦耳後人穿鑿遂繪錦焉殊不知詩所謂椅

桐梓漆爰伐琴瑟蓋皆通漆為飾無繪錦之說也
琴瑟壹體表裏通漆琴用玉徽瑟用錦襯庶幾古
人瑤琴錦瑟之制

論瑟不宜重不用架

嘗考瑟制長短輕重儀禮言之甚詳今為四圖如
左

左何瑟面鼓右手相工圖



左何瑟後首右手相工圖



相工就席向北近東坐圖



相者向東坐以瑟授工圖



鄉飲酒禮曰設席于堂廉東上工四人二瑟瑟先相者二人皆左何瑟後首揜越內弦右手相樂正先升立于西階東工入升自西階北面坐相者東面坐遂授瑟乃降鄉射禮曰席工于西階上少東樂正先升北面立于其西工四人二瑟瑟先相者皆左何瑟面鼓執越內弦右手相入升自西階北面東上工坐相者坐授瑟乃降燕禮曰席工于西階上少東樂正先升北面立于其西小臣納工工

四人二瑟小臣左何瑟面鼓執越內弦右手相入
升自西階北面東上坐小臣坐授瑟乃降大射儀
曰乃席工于西階上少東小臣納工工六人四瑟
僕人正徒相大師僕人師相少師僕人士相上工
相者皆左何瑟後首內弦跨越右手相後者徒相
入小樂正從之升自西階北面東上坐授瑟乃降
解曰古人席地而坐為工設席于堂上近南簷邊
面向北坐以東為上然後引工入凡工皆瞽者若

工四人則二人彈瑟用瑟二張若工六人則四人
彈瑟用瑟四張瑟先謂彈瑟者在前行歌詩者二
人隨入也相者扶也扶持瞽者與其引路也皆左
何瑟者引路之人就以左肩擔瑟也擗越者越瑟
底之空穴也以左手四指入瑟底空穴內捉之也
內弦者弦側向內也右手相者攙扶工也其相歌
者徒相謂空手扶之也坐授瑟者謂持瑟之人跪
於地然後將瑟遞與彈瑟之人也乃降者遞瑟已

畢退立於堂下也按禮記少儀云琴瑟執之皆尚左手蓋謂携琴挈瑟皆用左手而不用右手也若瑟長大且重兩手舉之猶難其能一手挈之歟觀此圖而玩味之則古之瑟制長短輕重可見矣

論瑟當以五事證

一儀禮左何瑟右手相二少儀琴瑟執之皆尚左

手三論語取瑟而歌舍瑟而作

已上三條證瑟體輕是故荷執取舍

利四曲禮琴瑟在前坐而遷之戒勿越

已上一條證瑟無架

古人只於五論語侍坐鼓瑟希鏗爾舍瑟而作上
地上一条亦證瑟不用
架鼓者坐而非立

論近代琴瑟失傳

嘉靖間太常寺典簿李文察上疏曰今奏樂者以
琴瑟為虛器雖設而不能盡鼓雖鼓而少得正音
蓋因琴瑟久貯內庫臨祭領出其弦多腐而不可
調或因瑟柱臨鼓而仆是故鼓琴瑟者不求其聲
之正惟求不絕不仆以免罪耳夫弦絕柱仆偶然

之失失之小者也琴瑟失音恃為故習失之大者也豈可以其小而犯其大者乎今後近祭之期預擇弦之精者而調習之庶臨時免絕仆之患偶或有之略恕其罪而不盡究則司琴瑟者乃可盡其能而於絲屬為備音矣文察又言鐘磬塤箎排簫音亦不備具說甚詳茲不載云

金音之屬總序

臣謹按聖人之作樂也文之以五聲播之以八音而

八音之始必原於律呂律呂之數肇於黃鍾黃鍾在子圓鍾在卯函鍾在未應鍾在亥一律三呂皆以鍾為名焉古語稱為鍾律之學然則鍾固樂之始也其大者為鐃鍾其小者為編鍾非大非小為特鍾爾雅曰大鍾謂之鐃其中謂之剽小者謂之棧是也且如編鍾之制周禮考工記鳧氏條下言其樣制最詳可見聖人制作之不苟也古鍾匾而不圓大小不一般鍾下有两角名曰鈇前後有乳三十六枚名曰枚鍾

上有柄名曰甬於架上側垂之以便於擊今則不然
圓如瓦罐大小若一式樣鄙陋後查文獻通考唐末
殷盈孫及五代王朴所造鍾律甚精悉依周禮樣制
至宋李照胡瑗皆非之始改鑄正其紐使下垂叩之
弇鬱而不揚遂欲毀前代所寶古鍾以滅其跡工人
不敢毀乃藏於太常神宗命楊傑造樂傑欲銷王朴
舊鍾意新樂成雖不善更無舊鍾可校乃詔許借朴
鍾為清聲不得銷毀後輔臣至太常按試前一夕傑

乃陳朴鍾已弊者一縣樂工不半夜易之而傑不知
明日輔臣至傑厲聲云朴鍾甚不諧美使樂工叩之
韻更佳傑大沮以此觀之則鍾制之陋自宋始也然
宣和博古圖亦宋人所撰三代古鍾之制備載其中
宋人好古如此之甚考古如此之精而不留意於當
代之樂特以三代之器為玩戲是可惜也陳暘諸家
樂書雖述考工記之法其為鍾圖亦陋似皆未見博
古圖歟後世如有興樂之士欲考三代之制而為鍾

者則博古圖亦有益之書也不可視為玩器而忽焉
博古圖載周制古鍾百有餘枚今摘其所長者錄之
如左

周蛟篆鍾

已下八條
出博古圖

昔張懷瓘在翰林時見古鍾紀夏禹之績皆紫金
鈿以大篆神彩驚人此鍾款識蓋亦鈿金篆也是
鍾甬旋比它鍾蟲鏤尤劇瑰妙當甬旋之間設環
象獸形聶崇義所謂旋當甬之中央為環飾之以

蟲曰旋蟲者是也爾後甬旋之制或變為龍螭虎
鈕與夫圓環之類蓋制作不純于古者如此

周特鍾

蓋比它鍾而黃鍾律倍半枚極修大衡甬室實自
于而上至於篆帶間皆作雲氣非文盛之世曷能
底此

周大編鍾

古之樂鍾形範非圓屬幹於簏而扣之則牢結不

動後世園具製而虛係以直垂值其考擊則搖曳而生餘韻失之遠矣觀此數鍾誠為得法

周細雷紋鍾

雷有回旋之義凡樂還相為宮以順四時之氣則亦寓諸回旋之意也隋文帝作樂而惟主黃鍾之均世名知樂者莫不非之事不師古則失其深旨奚可哉

周寶甬鍾

右五器雖設甬然實而不虛與它鍾特異

臣所見古鍾實甬者多而博古圖亦有此條故表
出之

周隧鍾

是鍾於鼓間隱起而中微窳則周官鳧氏所謂隧
鐃

臣所見古鍾有隧者絕少考之於圖亦不多見惟
此一條耳

周小編鍾

右嘗考律呂之制自黃鍾九寸等而下之至應鍾
四寸七分用以合陰陽之數至於為鍾小大增益
悉考於律故聲皆協應而不乖此鍾數雖未備然
其形制高下遞殺以小益亦取於律也彼禮圖編
鍾類皆一等未嘗參差如此益以厚薄取聲而不
知先王以律為本也

周環鈕鍾

周官鳧氏所鑄有所謂大鍾有所謂小鍾爾雅謂大鍾曰鑪中曰剝小曰棧而不言其量數樂律所用之處若樂鍾則惟特鍾鑄鍾編鍾三者而已是鍾形製尤小其編棧之屬歟

款文識文

已下二條出
洞天清錄


識乃篆字以紀功所謂銘書鍾鼎款乃花紋以易識古器款居外而凸識居內而凹夏周器有款有識商器多無款有識夏用鳥跡篆商用蟲魚篆周

以蟲魚大篆三代用陰識謂之堰囊字其字凹入也漢以來或用陽識其字凸間有凹者或用刀刻如鐫碑益陰識難鑄陽識易成陽識決非古物也款識真偽

古人作事必精緻工人預四民之列非若後世賤丈夫之事故古器款必細如髮而勻整分曉無纖毫模糊識文筆畫宛宛如仰瓦而又深淺如一亦明淨分曉無纖毫模糊此益用銅之精者並無砂

古鐘格式

類一也良工精妙二也不吝工夫非一朝夕所為
三也設有古器款識稍或模糊必是偽作




說見考證

鍾脣厚四分兩旁自舞至銑各長一尺二寸五分中間
自舞至于各長一尺兩銑左右相距亦長一尺銑間前
後相距廣八寸兩舞左右相距長八寸舞間前後相距
廣六寸四分


甬依寶甬之制衡端至舞八寸上圍五寸三分寸之一
下圍八寸旋圍一尺二寸九分寸之七下距舞九分寸
之八鍾紐名旋蟲形如獸面鍾乳名枚凡三十六其形
如乳

特鍾小樣



十二特鍾各
 以同名倍律
 為尺十二編
 鍾各以同名
 正律為尺四
 清聲鍾各
 以同名半律
 為尺每尺
 均為十寸每
 寸均為十分

編鍾小樣



欲造何鍾各
以其律為尺
造之長廣及
厚之數俱
如格式所說
鍾聲自與本
律相協若
或不協鍾聲
清則去其厚
濁則去其長

鍾銘

鍾乃樂之至重銅乃物之至精灋營援之古制攷
神瞽之中聲紀之以三平之以六母出均而擷輕
者从大重者从細惟尚羽而清小大器用於是乎
出律度量衡於是乎生九夏以之而立號四律以
之而得名故曰鍾律之學而為萬事之程以其下
體言之則于上謂之鼓鼓上謂之鉦以其上體言
之則舞上謂之甬甬上謂之衡陽有雷紋之款陰


有鳥迹之識塗以鏐鐐為飾鈿以瑠璃為宇神彩
驚人鏗鏘合志紀夏禹之丕績尚文王之追蠡為
咸池之主宰作蕭韶之根柢率鞀鼓兮在庭間等
笙兮在陛相應生變還相為宮不淫不傷惟蘇惟
中集大成於金玉總條理於始終

古鍾考證

周鍾舊樣是 漢鍾舊樣非

集樂全書

二五



宣和博古圖 宋陳旼樂書

考工記曰

周禮冬官篇名

六分其金而錫居一

五金總名曰金此金

謂赤金即紅銅是也每紅銅六斤外加白錫一斤也

謂之鍾鼎之齊

齊者分劑猶言

分兩也每紅銅六斤外加白錫一斤是鑄鍾分兩也劑古作齊而讀作藥劑之劑醫書有和劑局方

是又曰鳧氏為鍾

鳧氏染羽之條或疑錯簡傳寫

之誤當作鳧氏染羽鍾氏為鍾方是自此已下先釋鍾體名義而後方釋度數譬如人體有種種名

總名為網細名為目頭者乃總名也額顙頂等則細名也身者乃總名也肩背胛等則細名也鍾體

亦然經文甚明先儒未達註疏反晦今就經文解釋不用註疏之說則其理明白矣蓋鍾有上體有

下體有總名有細名先當分別何者為網何者為目曰甬曰鉦此二名者上體下體總名為網者也

角之一體又有銜幹旋蟲等名鉦之一體又有銑
于鼓舞等名則其細名為目者也先儒不言鉦是
總名將鉦混於鼓舞細名之中兩樂謂之銑古鉦
遂使經義晦矣是故先宜辨之
類今犁鐸兩旁有梭其名曰樂樂者瘠貌猶言梭
也樂下兩角銑利光澤具名曰銑銑者跣貌譬如
人之足也舊說樂銑一物二名俱謂鉦下兩角其
義晦矣新說上自鉦肩下至鉦足通成一枚總名
為銑方與下文十銑間謂之于兩角中間空處其
分具銑經義相合
曰于俗呼于上謂之鼓鼓上謂之鉦鉦上謂之舞
為鉦唇也
鉦之為言正也謂鉦之正體也譬如人之身也鉦
下際受擊處名為鼓譬如人之臂也鉦上際震動
處名為舞譬如人之肩也曰鼓曰舞蓋取鼓之舞
之義舊說中間一處為鉦新說自舞上際至鼓

下際通成一段總名為鉦方與舞上謂之甬甬上

謂之衡

舞者鍾肩甬者鍾柄古鍾皆有柄與俗鍾不同故其肩上極平而於平處安柄其名

曰甬甬者涌也言其巍巍然涌出也甬之上端其名曰衡衡者平也言其平頂堅實而甬中非空也

鑄鍾先鑄甬此處分兩最多也

鍾縣謂之旋旋蟲謂之幹

縣古懸字謂鍾

柄也柄下節有束腰旋遠於柄其名曰旋旋前有組謂鍾鼻也鼻上節有獸而吞口名為旋蟲又名

為鍾帶謂之篆篆間謂之枚

鍾體界道狀如田畦橫者如帶從者如箸

其名曰篆枚者即鍾乳也古鍾有乳狀如門釘前左前右後左後右分作四區每區九枚其名曰枚

前後兩面共計三十六枚舊枚謂之景枚下疑脫謂每面三十六枚其說非是

古文影字每一大區內上下橫分五小區三寬兩窄互相間隔寬處安乳窄處無乳其名曰景譬如圭表于上之擁謂之隧擁猶樊也擊處久則樊其

故名曰隧古文隧與隧通自鼓至十分其銑去二隧皆借別物之名而為鍾體立名

以為鉦釋名義竟方釋度數黃鍾正律之鍾中間自肩至唇其長一尺新法用紙一條長一

尺者比量自肩至唇取齊折作四折每折二寸五分將前一尺外加二寸五分共該一尺二寸五分

是其兩旁自肩至足之數又用紙條長一尺二寸五分者比量自肩至足取齊折作十折裁去二折

止餘八折除了二寸五分止餘一尺比量中間自肩至唇亦是一尺其數相同是名十分其銑去二

鉦也以其鉦為之銑間將前紙條比量自肩至唇其長一尺而又比量自左

角外至右角外亦是一尺其數去二分以為之鼓

間將前紙條比過兩角為一尺者折作十折裁去

其數相同是名去二分以為之鼓間以其鼓間為

之舞脩將前紙條比量鍾唇自前唇外至後唇外

是名外亦是八寸與前相同去二分以為舞廣將前

比量鍾肩自左至右長八寸者折作十折裁去二

自前至後亦是六寸四分是名去二分以為舞廣

其義一也或曰舞廣或曰鉦間其義一也此等名

義相混是故讀者難曉也以其鉦之長為之甬長

鉦之長即舞脩一物而二

名也甬者鍾柄之別名也先用紙條橫量鍾肩自左至右比量取齊該是八寸後將紙條縱量鍾柄

自上至下比量取齊亦是八寸其數以其甬長為相同是名以其鉦之長為之甬長也

之圓

鍾柄長八寸者其柄根下圓圓八寸以前八寸紙條圓之相同是名以其甬長為之圓也

參分其圓去一以為衡圓

將此圓根紙條折作三折截去一折止餘二折

除了二寸六分六釐止餘五寸三分三釐而圓鍾柄上稍平處名為衡者圓圓亦是五寸三分三釐

是名參分其圓參分其甬長二在上一下在下以設去一以為衡圓

其旋

參分其甬長者謂將八寸紙條比量鍾柄上自稍下至根取齊折作三折每折該二寸六

分六釐也二在上者謂其二折五寸三分三釐為上節也一在下者謂其一折二寸六分六釐為下節也以設其旋者謂鍾柄下節安束子也旋之形狀旋繞於柄今人俗呼束子是也束子圓圓一尺二寸高廣一寸七分七釐下距柄根八分八釐八毫上距柄稍五寸三分三釐束上安鼻鼻上有獸面是名旋蟲也其束圓

薄厚之所震動清濁之所

由出侈弇之所由興有說

其說見下

鍾已厚則石

已厚者過

於厚也石堅實貌謂鍾唇雖宜厚而自唇已上則漸薄可也當薄而不薄則通身一般厚堅實而聲石已薄則播

已薄者過於薄也播虛浮貌謂鍾體雖宜薄而將至唇處則漸厚可也當

厚而不厚則通身一侈則作弇則鬱長角則震者

般薄虛浮而聲播矣

張口貌弇者合口貌鍾口太張則聲非太是故大合則聲鬱及甬太長則聲搖拽皆非中和

鍾謂倍律之鍾也十分其鼓間以其一為之厚以紙條比鍾前後唇

外徑取齊折為十折取其一折裁作兩段各以小一段為前後唇之厚自唇已上則又當折半也小

鍾謂正律之鍾也十分其鉦間以其一為之厚鉦間即舞廣別名也

大鍾唇厚八分體厚四分小鍾唇厚三分二釐體厚一分六釐鍾大而短則其聲

疾而短聞去聲下同鍾小而長則其聲舒而遠聞為遂

與隧通六分其厚以其一為之深而圓之大可容椎

臣謹按明集禮有鍾圖與陳旸樂書鍾圖同其形

狹長上小下大不類鍾形三代古鍾宋時多自土
中出載於博古圖蓋得其真臣所親見者大中小
三等皆周物也與博古圖相類而與樂書不同按
圖考訂知古註疏皆有訛誤故今新擬如上所說
與博古圖蛟篆等鍾式樣相稱而長闊得中矣
論鑄鍾不調者必須更鑄始得

呂氏春秋曰晉平公鑄為大鍾使工聽之皆以為
調矣師曠曰不調請更鑄之平公曰工皆以為調

矣師曠曰後世有知音者將知鍾之不調也臣竊
恥之後師涓至果知鍾之不調是師曠欲善調鍾
以為後世之有知音者也

凡造樂器者
宜詳味之

論鍾磬有特縣編縣二者之別

先儒舊說特縣者器大而聲宏雜奏於八音之間
則絲竹之聲皆為所掩故但於起調畢曲之時擊
之以為作止之節其編縣者則聲器皆小故可以
雜奏於八音之間而不相凌也特鍾特磬每架惟

一至若編鍾編磬或云每架十二或云每架二十四此皆不知者妄說也太常鍾磬各皆十六蔡元定曰十六者四象相因之數也凡天地之變化萬物之感應古今之因革損益皆不出乎十六十六而天地之道畢矣是知編鍾編磬與夫排簫每架各皆十六亦自然之理也

論造筍虞不用羸羽鱗屬等飾

近代雅樂鍾虞之下有物形如獅子磬虞之下有

物其形如鷺而笥上有龍頭口銜流蘇以及博山
彩鳳等飾蓋祖古人所謂羸羽鱗屬業虞璧翬崇
牙樹羽之說竊謂此物設於廟中則是施於燕射
則非蓋近代禮家失於詳考耳按周禮考工記梓
人條下明言宗廟之事脂者膏者以為牲羸者羽
者鱗者以為筍虞據此特言宗廟所用則非餘處
所用明矣釋奠先聖雖與宗廟略殊然尚近之至
於燕射等禮或僭用之不亦謬乎世有鄉射儀節

等書所繪鍾磬虛下有獅子及鷺焉蓋不詳考遂致誤耳是故今議凡士大夫學雅樂者鍾磬筦簫只宜朴素不宜僭用宗廟筦簫虛之飾不獨免奢僭之嫌亦可謂之知禮矣

論學雅樂不用鐃鐃鐃鐃四金

按地官大司徒其屬有鼓人者掌教六鼓四金以節聲樂以和軍旅以正田役已上三言明其所掌非止聲樂一事故其下言以雷鼓鼓神祀以靈鼓

鼓社祭以路鼓鼓鬼享以鼗鼓鼓軍事以鼗鼓鼓
後事以晉鼓鼓金奏已上六物蓋即所謂以節聲
樂以和軍旅以正田役者也其下又言以金鐸和
鼓以金鐃節鼓以金鐃止鼓以金鐸通鼓已上四
物大司樂無之大司馬有之蓋此四金乃軍旅所
用非樂器屬也鼓人一官兼之是故不屬春官宗
伯而屬地官司徒其與大司樂所掌者異矣春官
小師條下鄭註和為鐸于固與經文不合除此之

外經文並無四金之名後世武舞雜用四金皆承襲之誤也是故此書不載鐸鐃鐃鐸惟載鍾鐃二者而已

石音之屬總序

臣謹按虞書曰擊石拊石先儒解曰重擊為擊輕擊為拊夫八音諸器皆不言輕重惟磬言之者豈無深意耶蓋磬有厚者有薄者厚者擊之宜重不宜輕輕則不清薄者擊之宜輕不宜重重則不和是以經文

有輕重之別也夫判縣者笙磬在阼階東其形厚而

小其聲清而高故與笙管協詩云笙磬同音又云磬

筦將將此之謂也頌磬在賓階西其形薄而大其聲

和而平故與歌頌協詩云既和且平依我磬聲此之

謂也笙磬之制以本律半數為鼓博其率五寸鼓博加半

為股博其率七寸五分股博倍之為股長其率一尺五寸股長加半

為鼓長其率二尺二寸五分參分其鼓博以其一為厚其率一尺六分

六釐此厚而小者也頌磬之制以本律正數為股博

一其率尺參分去一為鼓博

其率六寸六分六釐六毫

倍律為股長

其率

二尺三律為鼓長

其率三尺

七分其股博以其一為厚

其率一寸

四分二釐八毫

此薄而大者也嗚呼古之聖君能興樂教者

莫如舜古之賢臣能明樂事者莫如夔然舜命曰八

音克諧而夔惟以擊石為對則石乃八音綱領可知


矣若夫出產磬石之處考諸禹貢則徐州有浮磬而

梁州有璆磬雍州有球琳豫州有磬錯及山海經所

載出產磬石處未能遍舉似不拘於靈璧一處而已


唐制采華原石為磬正與禹貢之義相合而迂儒反
譏蓋未之詳考耳今懷慶府河內縣地方太行山諸
處亦產美石殊勝靈璧之磬磬之所產不拘何處惟
在人擇之耳有一種石其性最堅難於製造而聲最
佳又一種石性不甚堅易於製造而聲不佳然此二
種色貌相似託石工采之者往往為彼所欺但取易
造故不佳耳若夫真玉尤為難得士庶之家不宜用
也無磬則以槩缶代之

笙磬格式




其上段謂之股
長一律半博四
分律之三其下
段謂之鼓長二
律四分律之一
博半律通厚六
分律之一孔徑
十四分律之一

頌磬格式




頌磬上段謂之
股長二律博一
律其下股謂之
鼓長三律博三
分律之二通厚
股博七分之一
孔徑鼓博七分
之一其率見上

特 磬 小 樣



十二特磬各以
同名正律為尺
十二編磬各以
同名半律為尺
四清聲磬各以
半律之半為尺
每尺均為十寸
每寸均為十分

編磬小樣



欲造何磬各以
其律為尺造之
長廣及厚之數
俱如格式所說
磬聲自與本律
相協若或不協
磬聲清則去其
厚濁則去其長

磬銘

石乃天地自然之物磬乃聖人準彙之程故虞書
云擊石拊石百獸率舞而商頌曰既蘇且平依我
磬聲若夫簫管在庭琴瑟在堂笙磬頌磬處乎其
間為衆音之紀綱是知磬之為器豈惟含宮吐商
契律呂之微妙盡制度之精詳股博參分去一以
為鼓博鼓長參分去一以為股長倨句屈折能致
其曲端直中矩不踰其方體謙卑以自牧懷敬義

而含章介然有如烈士之辨堅節操以守封疆粹
然有如君子之行移風俗以正綱常憶昔尼父尚
茲雅音和而不流樂而不淫雖果哉之末難猶揭
淺而厲深若非荷蕢之賢孰識夫子之心人有存
歿道無古今拊之擊之堪羨堪欽

論磬石所產處

謹按禹貢九州言磬者三徐州泗濱浮磬磬非可
浮物而謂之浮者猶俗語所謂浮頭一層也舊註

以為浮者浮生於土不根著者是也蓋石之出土者常見風日厥質堅脆而性最靈是以為佳其埋沒土水中者不見風日厥性柔軟而聲不和此乃擇磬要訣然石工姦猾者患堅石之難琢往往竊以軟石易之凡監造之人不可不察也豫州錫貢磬錯錯雜也磬有特者編者大小不一故曰錯舊註謂錯為治磬之錯非也且冀州厥賦惟上上錯青州海物惟錯揚州厥賦下上上錯豫州厥賦錯

上中梁州厥賦下中三錯此乃禹貢文法錯皆訓
雜獨磬錯則不然誤矣梁州厥貢璆磬蔡氏曰璆
玉磬也磬石磬也林氏曰徐州貢浮磬梁州既貢
玉磬又貢石磬豫州又貢磬錯以此觀之則知當
時樂器磬最為重按璆字亦作球書曰戛擊鳴球
又曰天球在東序此天子之器也春秋齊侯以玉
磬賂晉師止兵臧文仲以玉磬如齊告糴此諸侯
之器也鄉飲鄉射皆有磬而不言玉磬蓋大夫士

之器惟石磬歟夫玉也石也一類之物耳故其用無異以貴賤之等言之則諸侯已上用玉已下用石宜矣古用泗濱浮磬蔡氏書傳曰今下邳有石磬山或以為古取磬之地一統志曰磬石山在邳州城西南八十里與泗水相近山有石其聲清亮可為磬禹貢泗濱浮磬即此山所出者又曰磬石山在靈璧縣北七十里山出磬石趙希鵠曰靈璧石出虹州靈璧縣其石不在山谷深山之中掘之

乃見色如漆間有細白紋如玉然不起峯亦無巖
岫佳者如菡萏或如卧牛如蟠螭扣之聲清越如
金玉以利刀刮之略不動偽者多以太湖石染色
為之蓋太湖石微有聲亦有白脉然以利刀刮之
則成屑按希鵠所說掘之乃得恐非古人所謂浮
磬嘗得數枚叩之不清亦無漆色蓋偽者耳今不
拘何處之石皆可但擇其聲佳者而已山海經曰
小華之山其陰多磬石郭璞註云即少華山在今

華陰縣石可以為樂器經又曰高山涇水出焉而東流注于渭其中多磬石郭云今涇水出安定朝那縣西筭頭山至京兆高陵縣入渭也經又曰鳥危之山其陽多磬石郭雖不言在何處今以涇水之文次序考之亦當在陝西也然則出磬之山不獨泗濱可知矣

論磬大小不等

宋製新樂特磬十二黃鍾厚二寸一分大呂已下

第加其厚至應鍾厚三寸五分范鎮議曰磬之用石者天成之物也各以其律為之長短厚薄而其聲和此出於自然而聖人知之取以為法後世不能考正遂使大小長短若一黃鍾之磬最薄而輕大呂已下漸厚而重至於應鍾最極厚重與律相乖而欲求其正音不亦遠乎臣謹按一統志金大定中汾東岸崩得古墓有鍾磬各數十小者僅五寸許大至三尺凡十二等音律之次後世別以厚

薄而此別以大小其制度皆周器非秦漢以後所作蓋與鎮說全同今仍宋制非也

論四清不可廢

左傳謂中聲以降五降之後不容彈矣則降用半律為清聲矣國語武王以夷則之上宮畢陳以黃鍾之下宮布戎則上宮聲高為清聲矣以至晉師曠師延之時亦有清角清徵晉人笛法正聲應黃鍾下徵應林鍾則清聲所由來遠矣特其用多寡

不同故有十三管之和十九管之巢三十六簧之
竽二十五弦之瑟則清聲寓於其中可知矣後世
儒者以漢成帝健為郡水濱得古磬十六枚正始
中徐州薛城送玉磬十六枚於是多宗鄭氏二八
之說用四清聲以謂夷則南呂無射應鍾四宮管
短則減黃鍾大呂太簇夾鍾四管之半以為清聲
而應之則樂音諧矣

論鍾磬不齊擊

孟子曰金聲也者始條理也玉振也者終條理也
孟子論始終條理以一音之始終言之非指一奏
之始終也祝敔為一奏之始終金玉為一音之始
終前音之玉繼以後音之金金而復玉玉而復金
欲其相連不欲其間斷是謂繹如也以成若小有
間斷則不成片段與造化之氣不相貫而不成樂
矣鍾以定其高聲以節其永人知高下之間不可
以或僭未知永短之間尤不可以或爽故曰歌永

言又曰依我磬聲蓋言歌聲與八音皆依磬聲以
為之遲速磬若急時則無永磬若緩時則過永無
永則佻過永則靡故舜命夔擊石拊石百獸率舞
夔乃憂擊鳴球搏拊琴瑟致神人之昭格夫八音
皆能感物而舜能感神人之盛獨歸於擊石者磬
終八音之條理故也後世鍾磬齊擊殊失始終條
理之義則磬聲一依於鍾聲不能為八音之所依
矣故朱熹文集曰金聲而玉振之者此以樂明之

也振而節之猶今樂之有板也

今議止用一磬

鍾磬者樂之節也節者俗呼板眼是也節貴乎簡故樂記曰繁文簡節之音縣鍾磬貴乎少故荀子曰縣一鍾而尚拊大戴禮曰縣一磬而尚拊此之謂也夫縣一鍾一磬者謂特縣之鍾磬此唐虞舊制也或以玉為之或以石為之則不拘耳玉為之者其名曰球益稷所謂鳴球顧命所謂天球孟子

所謂金聲玉振之類蓋玉磬之特縣者也石為之者其名曰磬舜典所謂擊石拊石禹貢所謂浮磬
柷磬論語所謂擊磬於衛之類蓋石磬之特縣者
也商周以降始有編縣之制故商頌有小球大球
蓋玉磬之編縣者也而周禮有編鍾編磬此石磬
之編縣者也要之編縣不如特縣之近古耳何況
又有宮縣軒縣判縣種種分別羸屬羽屬鱗屬種
種莊飾徒令見者驚猶鬼神而唐虞舊制益以支

離矣孔子曰禮與其奢也寧儉凡古制文過於質者非學樂之所急但從一磬尚拊之說庶幾唐虞之舊制耳

革音之屬總序


臣謹按鼓之制其名雖多大率不甚相遠伊耆氏之土鼓不過以瓦為其腔耳夏后氏之足鼓不過以鼓加其趺耳殷之楹鼓即今以柱為柄者也楹乃柱之別名如曰為屋幾楹是也周之縣鼓即今縣於鼓旁

者也建鼓即今插柄穿心鼓也繪以風雲雷雨之象
謂之雷鼓繪以麟鳳龜龍之象謂之靈鼓繪以飛鷺
盤旋之象謂之路鼓路鷺通省文也或難曰茲說亦
有考據乎答曰周禮大司樂云一變而致羽物及川
澤之示再變而致羸物及山林之示三變而致鱗物
及丘陵之示四變而致毛物及墳衍之示五變而致
介物及土示六變而致象物及天神四靈之物皆與
地祇並言象物則與天神並言故知象物乃雲雷之

象也鷺乃鼓精舊有是說隋唐已來刻翔鷺於鼓上
周制但繪鷺於鼓腔而已詩云振振鷺鷺于飛鼓咽
咽醉言歸此之謂也或曰八面六面四面何耶答曰
八面者一樣八副也六面四面放此猶今儀仗花腔
鼓二十四面杖鼓十二面非一鼓而有多面也舊說
及圖近乎穿鑿不必從也爾雅大鼓謂之鼗小者謂
之應然則不大不小謂之田又謂之棟棟一名朔鞀
應一名應鞀洪武正韻曰鞀亦作鞀騎上鼓也蓋今


俗呼鞭鼓是也古人謂之應鞭又謂之應鼓儀禮應
鞭在建鼓東禮記應鼓在縣鼓東先儒以為擊之便
也然則鞭乃便之訛歟路鼓已上雖大小不同而形
皆如鼓惟鞭之兩端一大一小此其異也又有曰搏
拊者以熟皮為囊而實之以糠左右兩手重擊為搏
輕擊為拊近代搏拊亦如鼓形古有雅鼓疑即此器
又有大鞀小鞀形如小鼓有柄有耳播之為樂今樂
無之蓋缺典也

足鼓 賁鼓 小鼓 樣




夏后氏之制曰
足鼓足者跌也
鼓下用柱柱下
用趺故曰足鼓
亦名賁鼓詩云
賁鼓維鏞周初
未有周制故用
夏后氏之制耳

楹鼓磬鼓小樣




殷制楹鼓者
柱也鼓甚大則
不可用趺但埋
其柱而堅築之
故曰楹鼓亦名
磬鼓詩云磬鼓
弗勝彼時未有
周制故用殷制

縣鼓在西小樣




周制縣鼓其說
見於毛詩戴記
而不見於周禮
儀禮然周禮有
晉鼓鼓金奏者
建鼓是也建鼓
兩旁所縣朔應
二鞀名縣鼓耳

應鼓在東小樣



詩云應田縣鼓
記曰縣鼓在西
應鼓在東蓋田
鼓與縣鼓乃一
器二名耳應田
縣鼓謂應與田
縣而鼓之雖似
三物實二物也

晉鼓路鼓小樣



晉鼓長六尺六寸兩面各徑四尺中間徑六尺六寸六分一名建鼓繪以雲雷則謂之雷鼓繪以四靈飛鷺則謂之靈鼓路鼓

古人之鼓不言用何木造今南方鼓則用楠木樟木北方鼓則用桑木梓木蓋隨鄉土所產之木庶幾便於用也周尚縣鼓而周禮書中不言其制度儀禮惟言建鼓歷代從之今擬以木為柱方七寸長丈二貫於鼓心鼓及柱皆光素黑漆其下有跗形如十字而不用獸跗庶幾質朴耳

諸鼓考證

周禮韞人

職名韞人當作鞫

為皋陶

皋鼓名陶當作鞫鼓腔也以木為之

長六

尺有六寸

此乃晉鼓之度數也。不言晉而言鼻，左何也？鼻鼓大，晉鼓小，舉大則小可知。

右端廣六寸

古人鼓皆橫擊，故稱兩面為左右端。廣六寸者，一版腔也。一周共二十版。

中尺厚三寸

每腔一版，其形中寬頭窄，中間廣一尺，厚三寸，兩頭廣六寸，厚二寸。

者三之一

穹謂穹隆如天之形，俗呼甕腹是也。算法四尺為實三，歸得一尺三寸三分加

在四尺兩旁共該上三正為定式。是以晉鼓諸鼓以徑六尺六寸六分。

鼻鼓其長短雖不鼓，據下文例則此當曰謂之晉同而圓徑皆同也。鼓今不然者，鼓上疑有脫文。

此鼓不言面之尺數，下文二鼓長八尺，兩面鼓四不言版之廣狹，蓋互相發明耳。

尺

面之徑也。中圍加三之一

中圍中開也。加三之一，即上文六尺六寸六分是也。

先儒以為五尺謂之鼗鼓

鼗一作音焚詩曰賁鼓維鏞為鼗鼓

鼻一作鼗音高詩曰鼗鼓弗勝長尋有四尺

兩面相距丈二鼓四尺面徑同前

倨句磬折

磬折指鼻鞠之形也先儒以為鼓形磬折非也磬折者直折也

凡冒鼓

冒猶張也俗呼緩鼓必以啓蟄之日

正二月天不冷不熟良鼓瑕如積

環

先儒舊註謂漆之文理也瑕猶弊也猶良琴之弊者有梅花斷紋也以此證之則古人鼓面皆

通鼓大而短則其聲疾而短聞

晉鼓之類是也鼓小而長


則其聲舒而遠聞

朔鞞之類是也

臣謹按周制鼓之名有六曰雷鼓曰靈鼓曰路鼓


曰鼗鼓曰鼙鼓曰晉鼓以雷鼓救日月以靈鼓攻
猛獸以路鼓達窮者與遽令則知不獨祭祀用之
而已若夫賁鼓維鏞則非止軍事也鼓鍾伐鼗又
非止後事也司馬春振旅軍將執晉鼓亦非止金
奏也鼓之用無窮豈可泥於一端哉

靴 鼓 小 樣




大靴長一尺面
徑一尺通柄長
四尺五寸聲洪
而徐篇首播之
小靴長七寸面
徑七寸通柄長
三尺二寸聲焦
而急章首播之

朔 鞞 小 樣




此器四名一曰
朔鞞二曰棟鼓
三曰縣鼓四曰
相鼓以木為腔
長二尺大面徑
一尺四寸小面
徑七寸聲洪而
徐類鞭鼓之聲

應 鞞 小 樣




此器四名一曰
應鞞二曰應鼓
三直曰應四直
曰鞞以木為腔
長一尺四寸大
面徑一尺小面
徑五寸聲焦而
急類杖鼓之聲

雅 小 鼓 樣



雅形類鼓木為
腔長一尺四寸
面徑七寸熟皮
縵之而實以糠
聲類搏拊拊在
堂上坐奏節歌
雅在堂下立奏
節舞其用不同

搏拊小樣



搏拊用熟皮縫成
袋長一尺四寸
面徑七寸實之
以糠用時置膝
上用畢置座上
座長一尺八寸
廣一尺連趺高
一尺趺高二寸

鞞鞞搏拊考證

儀禮樂人宿縣于阼階東笙磬西面其南笙鍾其

南鑄皆南陳

周禮曰凡縣鍾磬半為堵全為肆有鍾有磬為全鑄如鍾而大奏樂以鼓

鑄為節

建鼓在阼階西南鼓應鼙在其東南鼓

建猶也

以木貫而戴之樹之附也南鼓謂所伐面也應鼙應朔鼙也先擊朔鼙應鼙應之鼙小鼓也在東便其先擊小後擊大也鼓不在東縣南為君也西階之西頌磬東面其南

鍾其南鑄皆南陳一建鼓在其南東鼓朔鼙在其

北

朔始也奏樂先擊西鼙樂為賓所由來一建鼓也鍾不言頌鼙不言東鼓義同省文也

在西階之東南面

言面者國君於其羣臣備三面
爾無鍾磬有鼓而已其為諸侯

則軒縣

蕩在建鼓之間

蕩竹也謂笙簫之屬倚於堂

鼗倚于頌磬

西絃

鼗如鼓而小有柄實至搖之以奏樂也絃編磬繩也設鼗於磬西倚于絃也王制曰天子

賜諸侯樂則以祝將之賜
伯子男樂則以鼗將之

周禮大師大祭祀帥瞽登歌令奏擊拊

擊拊瞽乃歌也登歌

歌者在堂也登歌下管貴人聲也拊形如鼓以韋為之著之以鼗

下管播樂器令

奏鼓

鼓管乃作也特言管者貴人氣也下管吹管者在堂下

大鼓小鼓為大鼓先引故曰
引之引鼓 桴桴猶言擊桴詩云應桴縣鼓

大饗亦

如之小師掌教鼓鼗

執教替矇也出音曰鼓鼗如鼓而小持其柄搖之旁耳還

自大祭祀登歌擊拊

亦自有拊擊之佐大師令奏

下管擊應鼓

應鼗也應與棟及桐皆小鼓也

大饗亦如之替矇掌播鼗

播謂發揚其音

眡瞭掌凡樂事播鼗鍾師掌鼗鼓繚樂

作繚樂擊以和之

總論樂縣大縣

宮縣軒縣惟有名存然儀禮無之判縣特縣大縣

則有之矣荀子曰縣一鍾而尚拊大戴禮曰縣一

磬而尚拊自虞已來堂上有磬有磬必有鍾此荀

子所以有一鍾之說也儀禮鄉射及燕禮大射皆
席工于西階上北面東上則堂上之樂益皆西陳
而北面也儀禮工入則瑟先歌後獻工亦瑟先歌
後而樂正常立于西階東周禮登歌先擊拊是樂
正居歌西歌在瑟西而瑟又在拊西其他不可考
也周禮鼓人以晉鼓鼓金奏鐃師掌金奏之鼓鍾
師以鍾鼓奏九夏記曰入門而縣興春秋傳曰入
門而金作國語曰金不過以動聲又曰金石以動

之先儒謂凡樂先擊鍾次擊鼓是也小胥下管播
樂器令奏鼓輦瞽矇眡瞭凡樂事先播鼗然則輦
引鼓者也鼗兆鼓者也觀眡瞭播鼗擊頌磬笙磬
詩言鼗磬祝圉儀禮大射鼗倚于頌磬西紃言鼗
必及磬設鼗必倚磬之紃是鍾磬作則鼗已作及
下管播樂器而樂具作焉乃鼓輦以先之是鼗常
在前而輦常在後也先王賜諸侯樂則以祝將之
賜子男則以鼗將之以鼗不以輦則鼗先於輦可

知矣鍾磬之應歌者曰頌鍾頌磬其應笙者曰笙
鍾笙磬頌磬在西笙磬在東朔輦在西應輦在東
是堂下之樂貴西也堂下之樂貴西堂上之樂上
東者貴西所以禮賓上東於西階之上亦以其近
賓故也觀鄉飲酒鄉射之用樂皆樂正告備于賓
特燕禮告備于公以明君臣之分而已則樂為賓
設可知矣

論諸鼓

十三經註疏周頌曰應田縣鼓毛傳曰應小鞀也
田大鼓也縣鼓周鼓也箋云田當作鞀鞀小鼓在
大鼓旁應鞀之屬也聲轉字誤變而作田禮器曰
縣鼓在西應鼓在東註曰禮樂之器尊西也小鼓
謂之應疏曰案大射禮建鼓在阼階西南鼓應鞀
在其東一建鼓在南東鼓朔鞀在其北一建鼓在
西階之東南面大射禮是諸侯之法此亦諸侯之
禮所以大鼓及應所縣不同者熊氏云大射謂射

禮也此謂祭禮也是諸侯之法雖同諸侯祭射有
異案大射注云應鼙應朔鼙也又云便其先擊小
後擊大也以此言之則朔鼙應鼙皆縣大鼓之旁
先擊朔鼙次擊應鼙乃擊大鼓以其相近故云便
也以其稱朔朔始也故知先擊朔鼙以其稱應故
知應朔鼙也又大射稱建鼓此云縣鼓大射應鼓
既在大鼓之旁此應鼓在東乃與縣鼓別縣者皆
謂祭與射別也

臣謹按商頌曰置我鞀鼓毛傳曰殷人置鼓箴云
置讀曰植植鞀鼓者為楹貫而樹之鞀雖不植貫
而搖之亦植之類以此考之古人鼓制甚明觀鞀
則知鼓矣鼓鞀二器大槩相類周頌曰應田縣鼓
鄭箋皆以為小鼓毛傳以田為大鼓蓋謂比之於
應則為略大若二鼓並言之則皆小也縣鼓之說
惟毛詩戴記有之而周禮儀禮無之其樣製未詳
也周禮笙師掌教舂牘應雅應即應鞀也雅即雅

鼓也舂牘二字只是一器解見木音之屬條下先
儒以為三器皆舂於地非也近代雅樂呼楹鼓為
應鼓失之遠矣

論輦

或作輶通

陳祥道禮書曰周禮大師大祭祀鼓輦小師大祭
祀擊應然則大祭祀皆鼓輦擊應大射有朔輦應
輦詩又以應配輦則朔輦乃輦鼓也以其引鼓焉
故曰輦以其始鼓焉故曰朔是以儀禮有朔無輦

周禮有輦無朔猶儀禮之玄酒周禮之明水其實一也大射建鼓南鼓應鼙亦南鼓而居其東建鼓東鼓朔鼙亦東鼓而居其北則鼙與鼓比建而鼙常在其左矣朔作而應應之朔在西應在東則凡樂之奏常先西矣

論鼗或作鞀通

禮書又曰鼗之播也有瞽矇者有眡瞭者而其制鄭氏以為如鼓而小持其柄搖之旁耳還自擊是

也書曰下管鼗鼓合止祝敔記曰賜諸侯樂以祝
將之賜子男以鼗將之蓋祝以合樂鼗則兆鼓而
已故其賜所以不同也孔穎達曰祝所以節一曲
之始其事寬故以將諸侯之命鼗所以節一唱之
終其事狹故以將伯子男之命儀禮諸侯之燕大
射大夫士之鄉射鄉飲皆有鼗無祝諸侯之樂非
無祝也文不備爾

論搏拊

禮書又曰拊之為物以韋為之狀若鼓然書傳所謂以韋為鼓謂之搏拊是也實之以糠白虎通所謂拊革著以糠是也其設則堂上書所謂搏拊是也其用則先歌周禮所謂登歌令奏擊拊是也荀卿曰縣一鍾而尚拊大戴禮曰縣一磬而尚拊子夏曰弦匏笙簧會守拊鼓言尚拊則拊在一鍾一磬之東也言會守拊鼓則衆樂待其動而後作也拊書謂之搏拊明堂位謂之拊搏蓋以其或搏或

拊莫適先後也

臣謹接近代搏拊之制以木為腔形如小鼓而長
冒以熟皮或以生皮或著以糠或無糠焉嘗考古
制蓋不然也史記樂書弦匏笙簧合守拊鼓條下
唐張守節正義詳矣其說曰合會也守待也拊者
皮為之以糠實如革囊也用手撫之鼓也言奏弦
匏笙簧之時若欲令堂上作樂則撫拊堂上樂工
聞撫拊乃弦歌也若欲令堂下作樂則擊鼓堂下

樂工聞鼓乃吹管播樂也言弦匏笙簧皆待拊鼓
為節故言會守拊鼓也以此觀之則非以木為腔
之拊故文獻通考曰拊狀如革囊實以糠擊之以
節樂此說得之矣

革音四器節奏考

四器者鼓也拊也鞀也鞀也志八音者以節奏為
至要度數次之器數為末不必志之可也何謂節
奏若曰或歌詩一句擊鼓三或一章擊鼓三之類

是也何謂度數若曰晉鼓幾尺鼗鼓幾尺之類是也何謂器數若曰雷鼓幾面靈鼓幾面之類是也宋元鼓節兩字一擊臣嘗讀文選至祝敔希聲以諧金石之和鼗鼓踈擊以節繁弦之契因是而悟詩曰簡兮簡兮方將萬舞先儒或以簡擇簡易解之非也蓋簡乃鼓聲亦乃鼓節耳商頌奏鼓簡簡是也鼓為雄樂其聲象雷其形象天其於樂中為君其器不宜小小則不尊重其擊不宜輕輕則無

威嚴尤不宜繁故禮記曰鼓無當於五聲五聲弗
得不和鼓之為言孤也老子曰孤者王公以為稱
又曰大音希聲言其尊重而不繁也拊之為言輔
也擊之宜輕若夫繁則無妨近代雅樂與鼓相間
而擊雖名搏拊實乃鞀耳鞀之為言裨也裨乃補
助之意與鼓相間作者是也鼓聲疾而短聞必須
儲貳以補助之故曰鞀所以助鼓也先鼓而擊者
曰朔鞀朔者始也亦曰陳鼓陳者引也後鼓而擊

者曰應鞀亦曰應鼓應者言相承也朔應二鞀縣
於鼓旁即周之縣鼓矣鞀之為言詔也詔者告也
字亦作鞀鞀者兆也作樂之先兆也每章未歌之
前則先播鞀三通使人知樂將作一篇之始則播
大鞀一章之始則播小鞀既有篇章之異故有大
小之別近代雅樂無鞀無鞀而借搏拊代鞀誠缺
典也

土鼓
附錄

周禮籥章掌土鼓杜子春謂土鼓以瓦為匡以革為面鄭康成禮記註謂土鼓築土為鼓也二說異焉未詳孰是

木音之屬總序


臣謹按先儒有以八音配八卦者蓋後天卦方位巽在東南則祝敔在東南謂巽屬木而祝敔為木音故也雖然此亦理之最淺者也請詳言之以明古人深義撰祝敔之說曰易不云乎震起也艮止也震為龍

艮為虎其於先天方位則震在東北而艮在西北是故聖人則之設祝在東北形如仰盂以象震之所以起也設敵在西北形如伏虎以象艮之所以止也其於六十四卦則祝為豫而敵為履履者禮也豫者樂也履之象曰止天下澤履君子以辨上下定民志豫之象曰雷出地奮豫先王以作樂崇德殷薦之上帝以配祖考此之謂也樂者為同禮者為異樂勝則流禮勝則離合情飾貌者禮樂之事也樂著太始禮居

成物禮樂交際循環無端此祝敵之義也問曰祝非
龍形敵則虎形何也答曰樂由中出故靜禮自外作
故文由中出者故其椎名為止止者靜也自外作者
故其器形如虎虎者文也君子以謙退為禮以損減
為樂滿而不損則溢盈而不持則傾易曰履虎尾不
咥人亨故敵形如虎先王所以示安不忘危之戒歟
曰八音之器惟木音最質樸亦有說耶曰餘七音者
華美之音也祝以起之由質樸而始也敵以止之由


質樸而終也可見七音之華美皆歸於質樸猶木之
生由根本而蕃鮮由蕃鮮而歸根若發之為春華不
能斂之為秋實何以為木之結果此木音所以獨為
七音之起止也括首尾藏七音於中間譬諸君子衣
錦尚絅惡其文之著乎蓋禮始於報本樂始於尚德
其道本質而已飾之以文而後華美可觀於華美之
中不忘質樸之初意先王之道斯為貴焉故曰控楊
者德音之器也

樣小 祝



祝用楸木造其形類板斗板厚
五分口方二尺四寸底方一尺
八寸深亦如之下有趺高廣三
寸旁有孔圓徑六寸納手於中
持椎柄以撞擊椎形如柶首長
一尺柄長一尺八寸底中心開
一竅僅容椎柄透出底外鐵軸
貫之令搖動拔不出故名曰止

敵小樣



敵

敵用楸木造其形類板箱而覆
長三尺六寸廣一尺八寸高一
尺底向上其下有趺高廣二寸
此乃座也座上有物形如睡虎
伏地而卧脊背上有二十七齒
形如鋸齒名曰齟齬通以楸木
刻成夏敵物形如界尺長尺廣
寸厚分名曰簏亦以楸木為之

右祝敔二器今議通皆光素黑漆放琴瑟之質也
敔唐已來先擊首後擗背共六聲古法不擊首止
夏三聲今從之

祝敔考證

爾雅曰所以鼓祝謂之止註云祝如漆桶方二尺四寸深一尺八寸中有椎柄連底掘之令左右擊止者其椎名文獻通考曰祝如漆桶方二尺四寸深一尺八寸中有椎

柄連底

句

旁開孔

句

內手於中

句

擊之以舉樂

句

宋仁宗時禮官言鄭康成以為投椎其中撞之撞擊之法宜用康成之法奏可

爾雅曰所以鼓敵謂之鼗註云敵如伏虎

句背上

有二十七鉏鋸刻

句

以木長尺

句

擿之

句

鼗者其

名

句

文獻通考曰敵狀如伏虎背上有二十七齟

齟

句

碎竹以擊其首而逆擿之以止樂又曰宋因

唐制用竹長二尺四寸折為十二莖先擊其首次

三戛齟齬而止與舊用木櫟齟齬者異矣雖曰因時制宜要之非有意義孰若復古制之為愈哉

宋仁宗時學士王珪上言今升歌之樂無祝敔書曰戛擊是祝敔之用故傳曰堂上堂下各有祝敔聖人用以著樂之始終豈容有缺耶於是下禮官

議堂上始置祝敔

詳見歷代名臣奏議

臣謹按祝敔戛擊之法爾雅舊說最是唐宋妄改之皆非也今但從爾雅舊說可也又按書曰戛擊


鳴球搏拊琴瑟以詠漢儒以為夏即敔擊即祝搏拊即革音之屬六器皆堂上之樂宋儒見下文有合止祝敔不思祝敔二器堂上堂下通用輒將夏擊搏會於球磬搏拊傳會於琴瑟而祝敔遂為堂下之樂矣語曰吾從先進今亦但從漢儒舊說可也

展開春牘小樣

既醉以酒既飽以德君子萬年
介爾景福○既醉以酒爾穀既
將君子萬年介爾昭明○昭明
有融高朗令終令終有假公尸
嘉告○其告維何遵豆靜嘉朋
友攸攝攝以威儀○威儀孔時
君子有孝子孝子不匱永錫爾
類○其類維何室家之壺君子
萬年永錫祚胤○其胤維何天
被爾祿君子萬年景命有僕○
其僕維何釐爾女士釐爾女士
從以孫子○既醉八章章四句

春牘之為器猶
今拍板也以竹
為之形如竹簡
凡十二枚廣一
寸長一尺二寸
上端二寸之下
兩旁各有一孔
上長二分聯以

收合春牘小樣



皮條右手總握
上端而以下端
撻於左手掌中
是故不曰擊而
曰春非春築於
地也猶今撻衣
服古謂之撻衣
非謂白中搗也

春牘考證

周禮笙師掌教春牘應雅以教祓樂先儒謂春牘以竹為之其上端有小孔兩手春筴為樂之節蓋今世拍板之類也牘乃竹簡也古者大事書之於策小事簡牘而已策長二尺四寸牘長尺有二寸韋編三絕即是此器但失傳既久儒者不復識以為廣五六寸長七尺非也太常雅樂亦無春牘宜用泰尺製造廣一寸長一尺二寸二六編聯以象

律呂之數舛牘失傳或問見本卷之末簡

舞器之屬總序

論干戚二器

武舞用干戚者何也干者禮器也與兵器之盾不同焉兵器之盾以革飾之者有其用也禮器之干以漆飾之者昭其象也昭其象也者不過取其義耳夫干者君子所以為衛也為衛之道豈止一端明哲保身所以衛身也公侯干城所以衛國也視

民如傷所以衛民也如是之類未能盡舉凡器用之物有衛之象顯然可見者莫如干焉舉一隅則三隅可知矣是故君子觀童子操干而舞者則思所以為衛之道也戚者亦禮器也與兵器之鉞不同焉兵器之鉞以鐵為之者有其用也禮器之戚以木為之者貴其象也貴其象也者不過取其義耳夫戚者君子所以為斷也為斷之道豈止一端其利斷金以心言之也斷斷兮無他技以貌言之


也臨事而屢斷以勇言之也如是之類未能盡舉
凡器用之物有斷之象顯然可見者莫如戚焉舉
一事則萬事可推矣是故君子觀童子仗戚而舞
者則思所以為斷之道也聖人制禮作樂之意蓋
有深旨非欲操干弄戚徒象武功而已昧於此者
以為舞干戚使人習武備噫苟欲其知武則凡兵
器若矛戟刀劍之屬孰有不可而何獨取於干戚
乎或難曰大司馬之屬司兵司戈盾祭祀授舞者

兵此何兵耶答曰大司樂之屬有司干者所掌舞
器即所謂干戚也司兵司戈盾所掌皆兵器耳祭
祀授舞者兵蓋大司樂之屬有韎師有旄人皆掌
夷樂祭祀則帥其屬而舞或亦用戈不可考也夫
戈之與戚俱有斷義其相去則遠矣考工記云青
與赤謂之文赤與白謂之章白與黑謂之黼黑與
青謂之黻文章黼黻先王貴之或繡諸裳或飾諸
領或施諸展或純諸席或弊諸璜或繪諸冪至於

喪禮尚質猶有所謂黼殺黼荒黼嬰之類則凡吉凶之禮無適而非黼之宜也聖人有取於斧之義
既可見矣

干用桐木為之厚三分長四尺五寸上廣一尺二寸八分半
下廣七寸七分圭首劒脊頂高於肩三寸脊高於肩一寸半

干小樣



表隆裏窪隨其勢窪中有梁長四尺五寸廣一寸有鼻可以
容手表裏髹以黑漆正面中間畧近上書春夏秋冬字為號

戚小樣

斧頭長六寸廣三寸厚一寸五分飾以黑漆其方中矩去斧頭一寸半為孔去孔一寸半為刃廣六寸飾以粉其圓中規



斧柯長三尺圓而微匾廣一寸厚八分上端四寸五分為箕厚七分貫斧孔中上出一寸五分髹以黑漆斧用楸木為之

臣嘗考戚之制度則周禮考工記曰柯長三尺搏
三寸厚一寸有半五分其長以其一為之首註云
首六寸謂今剛闕頭斧柯其柄也疏云凡造作皆
用斧因以量物故先論斧柄長短及刃之大小也
此則斧之遺制蓋可考也考工記又云凡兵句兵
欲無彈刺兵欲無峭是故句兵捍刺兵搏註云句
兵戈屬刺兵矛屬彈謂掉也峭謂撓也齊人謂斧
柯為捍則捍隋圓也搏圓也疏云捍隋圓者謂側

方而去楞是也則斧柄之制又可考焉先儒嘗謂
干長一柯有半是謂磬折七分其長以其二為之
上廣五分上廣去其二為之下廣凡干圭首而劍
脊首高於肩三寸脊高於肩半之降殺至下各隨
其勢表隆裏窪皆厚三分窪中有梁通頂至踵五
分其長二在上三在下有紐紐可容手持之以舞
此干制大略也

論羽籥二器

文舞用羽籥者何也周禮舞大夏大夏即文舞也
秉翟尾以為容故謂之夏徐州厥貢羽畎夏翟是
也翟乃雉雞之屬其類不一爾雅釋鳥有九雉之
名焉一曰鷩雉二曰鷮雉三曰鷦雉四曰鵀雉五
曰鷩雉六曰海雉七曰山雉是謂之翟蓋雉之長
尾者八曰雉雉九曰鷩雉雉絕有力曰鷩素質五
采成章曰翬青質五采成章曰鷩南方曰鷩東方
曰鷩北方曰鷩西方曰鷩此四方雉名也夫雉其


身有文章其性又耿介故先王貴之者其為用亦
不一用於五玉三帛二生一死之屬貴其性也用
於山龍華蟲宗彝藻火之屬貴其文也是故羽舞
謂之文舞取其耿介而有文章類乎士之德也詩
云左手執籥右手秉翟書曰帝乃誕敷文德舞干
羽于兩階此之謂歟嗚呼雲門咸池六莖五英尚
矣以可考者言之若堯之大章舜之韶禹之夏周
之象則皆文舞蓋進退舒徐揖讓升降以為儀周

旋中規折旋中矩以為節手之舞之足之蹈之以
為態使人興感於至德也深矣故孔子曰樂則韶
舞韶盡美矣又盡善也學之三月不知肉味此之
謂歟而先儒之惑者因詩有值其鷺羽之說遂云
用鷺因易有鴻羽為儀之說遂云用鴻殊不思鴻
鷺之羽質素無文何以謂之文舞易象所喻變風
所指而非文舞之正例也雖然翟羽之制亦有二
說柄長三尺其端龍口中植翟尾三莖是一說也

柄長五尺其端龍項下垂雉羽五層又一說也惟
引舞所持者或用彩繒之帟或用彩羽之旌或用
白羽之翾或用紅纓之旄引舞之器凡有數種以
別文武二舞而已

簫長二尺而有三孔其內外徑詳見黃鍾倍律之簫條下


簫小翟樣



翟羽三根竿長三尺徑七分其圓月上書春夏秋冬字號

周禮有旄人及旄舞樂記曰千戚羽旄謂之樂旄者節之屬

旄小樣



竿長八尺上掛染成五色纓五層象五聲也或一色紅亦可

麾不經見而歷代有之用布一幅長八尺兩面繪水墨升蟠

麾小樣



三爪而無珠樂作舉之止則偃之置於杙上蓋象雷出地奮

總論古樂絕傳之由

古樂絕傳其故何也竊疑古樂絕傳蓋由先儒紀載失實稱譽過高所謂高過大學而無實者理管飛灰等說是也後世君子欲學古樂宜以虞書為法間用周禮補其缺略不必盡從舊說可也屢擊鳴球搏拊琴瑟簫管笙鏞鞀鼓止此十有二器堂上堂下之樂備矣然而八音則未備也說者以為塤箎始於蘇暴于戚始於湯武殊不思書所謂八音克諧八音在治

忽既曰八音則有土音矣唐虞之世不應無埙簫也
書所謂舞干羽則有干戚羽籥明矣觀其教胄子八
音克諧則公卿大夫元士之子皆得學八音矣觀其
四海遏密八音則知八音遍天下矣論樂縣則天子
宮諸侯軒大夫判士特論舞佾則天子八諸侯六大
夫四士二然則大夫士樂舞非僭也孔子學琴於襄
訪樂於弘鼓瑟擊磬而不自以為僭然非君所賜也
迂者或謂君賜而後敢學誤矣禮樂不可斯須去身

非若弓矢斧鉞君賜然後敢征伐也世儒泥於王制
之文視禮樂征伐為一等此絕傳之由也又按禮不
下庶人而子游以為小人學道則易使今宜體此意
始於庶人自下而漸增焉除金石草木四音不增外
絲竹匏土諸器各一舞用一人庶人禮也諸器各二
舞用二佾益士禮也諸器各四舞用四佾大夫禮也
諸器各六舞用六佾諸侯禮也諸侯不得制禮作樂
謂創作也學古之禮樂無妨也慎勿過疑過疑而不

敢學則古之禮樂所以絕傳也朱熹有言今之士大
夫問以五音十二律無能曉者要之當立樂學使士
大夫習之久後必有精通者出臣愚竊謂立學不便
只許好事之家造樂器肄習之而無禁最便也

凡合樂每詩一篇之首擊祝三聲一章之首播鞀
三通一句之首擊鏞一聲一字之首擊鍾一聲一
倡之尾一和之首擊磬一聲每吹一聲琴彈三十
二聲瑟亦如之每一句畢鞀鼓一聲應鞀一聲大

鼓三聲應鞀間之次句首擊鑪次章首播鞀皆同
前也至一篇終然後撥啟宋元已來先擊啟三聲
而後撥三聲共為六聲今考先儒原無此說但撥
三聲不擊啟者是為得之

合樂有譜詳
見外篇雜篇

臣謹按朱熹曰古者教法禮樂射御書數不可闕
一就中樂之教尤親切夔教胄子只用樂大司徒
之職也是用樂蓋是教人朝夕從事於此物得心
長在這上面蓋為樂有節奏學他底急也不得慢

也不得久之都換了他一副當情性玩味樂譜此
言信矣

附錄

古樂或問十條

一問祝啟設於堂上何也

二問祝啟以三為節何也

三問搏拊韋表糠裏何也

四問搏拊未歌先擊何也

五問舂牘失傳已久何也

六問鞀鼓失傳已久何也

七問鞀鼓失傳已久何也

八問應鞀失傳已久何也

九問琴瑟失傳已久何也

十問管籥竽簫失傳何也

答第一問祝敔德音之器樂之綱領聖人重之不獨設在堂上而已古者天子賜公侯樂以祝將之賜伯

子男樂則以鞀將之是知鞀之尊不如祝餘器之尊則又不如鞀蓋堂上之樂祝為之長而堂下之樂鞀為之長也曰憂擊曰楷擊曰控揭皆祝啟別名以其體言則曰祝啟以其用言則曰憂擊一物而二名也為堂上作則曰憂擊為堂下作則曰祝啟一器而二事也事異則名別其實一物耳虞書憂擊鳴球搏拊琴瑟漢儒舊說以為憂擊木音也鳴球石音也搏拊革音也琴瑟絲音也四音六器皆堂上之樂也下文

又言合止祝敵則堂上堂下各有祝敵矣宋儒新說
以為屢擊鳴球只是鳴球一物搏拊琴瑟只是琴瑟
二物堂下既有祝敵則堂上無之矣我國朝洪武初
開科取士詔諸生兼習古註疏不必盡主宋儒之說
而於漢唐舊說擇其所長者多從之此類是也考諸
明集禮存心錄等所載圖式祝敵搏拊其位設於琴
瑟歌工上則知皆從漢儒舊說而不用宋儒之說也
答第二問一數陽奇二數陰偶陰陽相合而萬物生

昔人有言一生二二生三三生萬物夫三者一二相合也天地三月而為一時聖人則天是故禮有三節樂有三終不獨祝敔二器為然若夫播鼗三通每通暗合舂牘三聲鍾磬間長皆隔舂牘三聲鼓鞀間短皆隔搏拊三聲或明顯或暗合無不皆以三聲為節此乃天地自然之理先王雅樂之遺法也至於後世猶然所謂漁陽三搯梅花三弄陽關三疊是也以此觀之祝三聲而樂作敔三聲而樂止不必更添擊虎

首三聲也惟於此時依隨春牘三聲而為撥敵節奏可也

答第三問按文選所謂鼙鼓踈擊即老子所謂大音希聲之意搏拊節奏數而不希故用韋表糠裏亦猶中庸所謂惡其文之著也之意宋陳旸曰拊之為器韋表糠裏狀則類鼓聲則和柔倡而不和豈徒鏗鏘而已書傳謂以韋為鼓白虎通謂革而糠是也其設則堂上虞書所謂搏拊是也其用則先歌周禮所謂

登歌令奏擊拊是也書言搏拊明堂位言拊搏者以
其或搏或拊莫適先後也荀卿曰縣一鍾而尚拊大
戴禮曰縣一磬而尚拊則拊設於一鍾一磬之東其
衆器之父歟荀卿又曰鼓其樂之君耶然鼓無當於
五聲五聲不得和其衆聲之君歟樂記曰會守拊
鼓堂上之樂衆矣所待以作者在拊堂下之樂衆矣
所待以作者在鼓蓋堂上則門內之治以拊為之父
堂下則門外之治以鼓為之君內則父子外則君臣

人之大倫也而樂實通而合和之此修身及家平均天下所以為古樂之發也

答第四問左手輕擊為拊右手重擊為搏但以手擊不用杖擊是以書曰搏拊記曰拊搏蓋言一搏間一拊更迭而奏也古人登歌令奏擊拊擊即舂牘拊即搏拊搏拊亦名曰雅其在堂上坐奏以節歌者則謂之拊其在堂下立奏以節舞者則謂之雅周禮曰令奏擊拊樂記曰會守拊鼓是乃拊之用也周禮曰舂

牘應雅樂記曰迅疾以雅是乃雅之用也陳祥道曰
樂記言會守拊鼓則衆樂待其動而後作也既曰會
守拊鼓又曰治亂以相則相非拊也鄭氏以相為拊
誤矣爾雅曰和樂謂之節或說節即相也江左清樂
有節鼓唐雅樂升歌用之其詳不可考也今按相乃
鞀之別名雅乃拊之別名節亦拊之別名非相之別
名也節之為言譬如竹竿從本及末無一處非節也
拊之為節亦然是以聞祝聲而拊作所謂先於歌也

聞啟聲而拊止所謂後於歌也中間踈數重節所謂
間若一也始終無間斷所謂繹如也太常雅樂以搏
拊代應鞀是以與鼓相間而擊其名雖曰搏拊其用
實乃應鞀蓋近代諸儒失於詳考耳搏拊失傳遞使
雅樂無節記曰樂也者節也君子無節不作此乃樂
律家第一當講究而不可忽也

答第五問雅樂之器有名曰舂牘者見於周禮笙師
條下古註疏云舂牘以竹大五六寸長七尺短者一

二尺其端有兩孔以兩手築地此蓋後漢所製大予
樂官掌之非周物也周物失傳漢儒不識道聽途說
半是半非所謂以竹為之短者一二尺其端有兩孔
是也所謂大五六寸長七尺者非也今按牘亦名版
周禮大胥掌學士之版註云版籍也左傳序曰大事
書之於策小事簡牘而已古註疏引許慎說文曰簡
牒也牘書版也蔡邕獨斷曰策者簡也其制長二尺
短者半之由此言之簡策同物而異名也單執一札

謂之為簡連編諸簡乃名為策故於文或作冊象其
編簡之形以其編簡為策故言策者簡也鄭玄注論
語云春秋二尺四寸書之孝經一尺二寸書之故知
六經之策皆長二尺四寸蔡邕言二尺者謂漢世天
子策書所用故與六經異也簡之所容一行字耳牘
乃方版版廣於簡可以並容數行凡為書字有多有
少一行可盡者書之於簡數行乃盡者書之於方方
所不容者乃書於策聘禮篇曰若有故則加書將命

百名以上書於策不及百名書於方鄭玄云名書文也今謂之字策簡也方版也是其字少則書簡字多

則書策

已上皆春秋左傳註疏文

按國語曰紀之以三平之以六

成於十二天之道也左傳亦曰制禮上物不過十二益十二乃律呂全數六乃律呂半數是故舂牘以竹為之廣一寸長尺二寸凡十二簡而為一編象律呂之全數版則以木為之廣三寸長尺四寸凡六枚而為一串象律呂之半數然則牘乃版之別名版乃牘

之遺制今俗樂有版而雅樂缺焉禮失求野則得之矣搏拊舂牘樂之節也古所謂觀樂知政者豈別有術哉觀其節奏和否而已和也者齊聲相合也節也者板眼不差也曰和曰節樂之能事畢矣無餘蘊矣樂記曰大樂與天地同和大禮與天地同節禮樂大事要在和與節耳古人所重可不重乎

答第六問古之雅樂重在祝嘏鞀鼓與磬而已書曰憂擊鳴球又曰下管鞀鼓商頌曰置我鞀鼓又曰鞀

鼓淵淵嘒嘒管聲既和且平依我磬聲周頌曰鞀磬
柷圉既備乃奏周禮小師瞽矇眡瞭職掌之事皆以
鞀磬柷敔四者為先儀禮亦有鞀倚於磬之說樂記
曰聖人作為鞀鼓控楬璫箎此六者德音之音也然
後鍾磬竽瑟以和之干戚旄狄以舞之此所以祭先
王之廟也所以獻酬酢也所以官序貴賤各得其
宜也所以示後世有尊卑長幼之序也是知堂下樂
以鞀鼓為首不可缺也

答第七第八第九第十問八音諸器有圖有譜有論
有辨載諸內外篇已詳著茲不復贅若能學而時習
之則不在於失傳矣

正月學琴

兼歌

二月學瑟

兼歌

三月學小笙

四月學大笙

五月學小竽

六月學大竽

七月學排簫

八月學編管

九月學箛篴

十月學塤箎

十一月合樂

十二月合舞

樂律全書卷九